

Ն. Ս. Օ. Տ. Տ. ԳԱՐԵԳԻՆ Բ
ԱՄԵՆԱՅՆ ՆԱՅՈՑ ԿԱԹՈՂԻԿՈՍԻ
ԱՄԱՆՈՐԻ ԽՈՍՔԸ
 (31 դեկտեմբերի 2001 թ.)

Միրելի ժողովուրդ հայոց.

Նոր Տարի է սեմին: Թերթում ենք պատմության ևս մեկ էջ, նոր հազարամյակի առաջին՝ 2001 թվականի էջը, որը ոսկեգիր է ու ոսկեկնիք Հայաստանում քրիստոնեության պետական կրոն հռչակման 1700-ամյակի և Հայաստանի ու Արցախի անկախության տասնամյակի մեծապահանջ խորհուրդներով:

Քարծրյալի օրհնյալ Կամքի հայցումով բարի տարի ապրեցինք: Առավել աղոթք բարձրացավ երկինք հայ հոգիներից: Աստծո խոսքը առավել ու առավել լսելի եղավ մեր ժողովրդին, և օրհնվեց ազգս հայոց: Խաղաղության օրհնություն իջավ Հայաստան և Արցախ հայրենի մեր երկրին: Արդարության շնորհ իջավ հայոց կյանքին: Ֆրանսիան օրենքի ուժով դատապարտեց Հայոց ցեղասպանությունը:

«Փառք Քեզ, Աստուած, յաղագս ամենայնի Փառք Քեզ»:

Քրիստոնեությունը Հայաստանում պետական կրոն հռչակելու հայոց մեծ տարեդարձը նշանավորվեց իբրև համաքրիստոնեական իրադարձություն: Հայաստան այցելեցին և մեր ժողովրդին իրենց հայրական սրտի ամենաբարի մաղթանքներն ընծայեցին Ռուս Ուղղափառ Եկեղեցու և Կոստանդնուպոլսի Տիեզերական Պատրիարքները, Հռոմի Սրբազան Քահանայապետը, քույր Եկեղեցիների հոգևոր պետեր ու բարձրաստիճան ներկայացուցիչներ, բարեկամ պետությունների պատվարժան պատվիրակներ:

Հավատավոր հայ հոգու նոր վկայություններ եղան նորոգված ու նորակառույց սրբատեղիները՝ տարբեր երկրներում, բայց մանավանդ՝ հայրենի հողի վրա: Հայոց Մեծ Դարձի լույսով հազարավոր հայ մանուկներ ու մեծեր ստացան մեր Սուրբ Եկեղեցու մկրտության դրոշմը և այսօր նոր տարին դիմավորում են իբրև հայ քրիստոնյաներ: Տասնյակ ձեռնադրյալ հոգևորականներ հովվության իրենց գավազանն առան՝ 301 թվականի խորհրդով սկսելով իրենց սպասավորությունը: Ապրեցինք Հայրենիք-Միություն միասնականությամբ, միմյանցով ուժեղ լինելու վստահությամբ, որի քարեղեն մարմնացումը 1700-ամյակի Հաղթականար՝ քաղաքամայր Երևանի Սուրբ Գրիգոր Լուսավորիչ Մայր եկեղեցին է, որի լուսեղեն խորհուրդը՝ 1700-ամյակի նորօրհնյալ Սրբալույս Մյուռնը:

«Փառք Քեզ, Աստուած, յաղագս ամենայնի Փառք Քեզ»:

Գոհունակության այս զգացումով ենք հրաժեշտ տալիս 2001 թվականին: Հավատում ենք, որ պարզևս ուրախությամբ ու լավատեսությամբ, հոգևոր լիցքով անցնող տարին դառնալու է մեր կյանքի բարեշրջությունների երկնք, խրախույս ու ներուժ:

Միջոցով ժողովուրդ հայոց ի Հայաստան, Արցախ և ի Միյոյոս:

Ամանորի խորախորհուրդ այս գիշեր ամեն հայի հոգում վերստին աղոթք է՝ շաղախված անցնող տարվա հուշերի, բայց առավել ևս՝ նոր տարվա հույսի հետ:

Միջոցներ, մենք խաչելությամբ չէ, որ խաչակից ենք Քրիստոսին, այլ՝ Հարությամբ: Հայրենական կյանքի դժվարությունները, տևական հոգսերից մեր սրտերում ծանրացած վրդովմունքը, օտարության մեջ իրենց բարությունը փնտրող հարազատների կարտոր մեր հոգիներում, այլև անվստահությունն ու անհանդուրժողությունը և այլ ինչ գործ չար, չեն կարող խամրեցնել կյանքի մեր լավատեսությունը, սասանել՝ հայրենակերտումի մեր կամքը, չեն կարող ազգային իդժերի իրագործման նվիրական ճանապարհին նահանջի շեփոր հնչեցնել: Քաջերի հետնորդները քաջերն են: Արիությանը վատություն չխառնենք: Այս է պատգամը մեր հայրերի: Չերկնչենք և չտկարանանք: Հավատարիմ լինենք ինքներս մեզ: Պահենք մեր ընթացքը հավատարիմ Աստվածասեր մեր հայրերին, հավատարիմ՝ քրիստոնեական մեր արժեքներին ու հայրենյաց սրբություններին: Պահենք 88-յան ազատատենչ, միաբան, արի ոգին, 2001 թվականի աղոթախոս հոգին, հույսով, հավատով, սիրով զորացյալ՝ արարող ու աշխատասեր հոգին: Սա է հայոց նկարագիրը:

Այսօր հիշենք առավել, որ ուխտավորի ճանապարհ ենք անցնում: Ուխտավորի ճանապարհը զորացնում է անվհատ ու անմահանջ առաջ ընթանալու, անհնարինին հավատալու, անհնարինը իրաշագործելու: Ուխտավորի վստահությամբ քայլենք նոր տարում: Ուխտավորի ճանապարհը Տիրոջով է հաջողյալ: Հավատանք, 2002 թվականը դառնալու է ձեռքբերումների ու հաղթանակների տարի:

Շնորհավոր Ամանոր: Բարի երբ Տիրոջով: Խաղաղությամբ և ժողովուրդների բարեկամությամբ օրհնյալ 2002 նոր տարի: